

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒՅՑԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ը. Տարի, Թիւ 321, Ուրբաթ, 19 ՓԵՏՐՈՒՄ, 2016

ՀԱՄԱՅՆՔԱՅԻՆ

ՏԵԱՌՆԸՆԴԱՌԱՋԻ ՆԱԽԱՏՕՆԱԿ ԵՒ ՀՐԱՎԱՌՈՒԹԻՒՆ

Շաբաթ, 13 Փետրուարի երեկոյեան ժամը 6:00-ին, Սրբոց Վարդանանց Եկեղեցոյս մէջ տեղի ունեցաւ Տեառնընդառաջի նախատօնակ, որուն ներկայ էր հաւատացեալներու հոծ բազմութիւն մը: Երեկոյեան Ժամերգութենէն եւ նախատօնակի արարողութենէն ետք Քուէթի եւ Շրջակայից Թեմի Առաջնորդ՝ Գերպ. Տէր Սասիս Ծ. Վրդ. Զօպույեան համախմբուած հաւատացեալներուն փոխանցեց օրուան խորհուրդը, օրինակ առնելով Սիմէոն Ծերունիի ու Աննա



Մարգարեուհիի հաւատքով եւ մեծ համբերութեամբ երկար տարիներու սպասող, սակայն չվիատող օրինակը, պատգամելով բոլորին անսասան մնալ հաւատքի մէջ ու երբեք չկորսնցնել փրկութեան յոյսը:



Այնուհետեւ, Գերպ. Հայր Սուրբը գլխաւորեց հաւատացեալներու թափօրը դէպի եկեղեցոյ շրջափակ, ուր հրավառեց տեառնընդառաջի խարոյկը:

Քուէթի Ազգային Վարժարանը նշեց «Գիրք Նուիրելու» տօնը

Գիրք նուիրելու տօնը բազմախորհուրդ է. Առաջին հերթին ան կը յիշեցնէ մեզի գիրքին արժէքը, ապա տարուան մէջ գոնէ մէկ անգամ թոյլ կու տայ մեր հարազատներուն եւ մտերիներուն նուիրել գիրքեր: Գիրքը մարդուն անդաւաճան ընկերն է, անոր ապրումներուն շտեմարանը: Գիրքը կ'ազնուացնէ մարդուն հոգին, զայն դարձնելով առաւել հանդարտ ու բարի:



Հինգշաբթի, 18 Փետրուար, 2016-ի առաւօտուն Բուէթի Ազգային Վարժարանի աշակերտութիւնը նշեց արդէն աւանդոյթ դարձած «Գիրք նուիրելու» օրը: Բացման խօսքին մէջ Թ կարգի աշակերտուիի Ալիս Քէչէճեան, անդրադառնալով յիշեալ օրուան, ըսաւ. «Հայաստանի մէջ գիրք նուիրելու օրը, Հայաստանի Հանրապետութեան Կառավարութեան նախաձեռնութեամբ եւ այդ օրերու Հայաստանի Գրողներու Միութեան նախագահ Լեւոն Անանեանի որոշումով, կը նշուի 2008 թուականէն: Գիրք նուիրելու գեղեցիկ տօնը կը նշուի Փետրուար 19-ին՝ Ամենայն Հայոց Բանաստեղծ Յովհաննէս Թումանեանի ծննդեան օրը: Այս ընտրութիւնը ամենեւին ալ պատահական չէ, քանզի մեզմէ շատ-շատեր հայ գիրքը ճանչցած են Յովհաննէս Թումանեանի հիանալի հեքիաթներով: Մենք ալ մեր հերթին, որպէս Հայաստանի Հանրապետութեան ազնիւ քաղաքացիներ եւ հայ գիրքը արժանիօրէն կրող հայեր, այստեղ, Ազգային



Վարժարանի շրջափակէն ներս, հաւաքուած ենք, արդէն երկրորդ անգամ ըլլալով նշելու գեղեցիկ տօնը»:

Այնուհետեւ Դ կարգի աշակերտները երգեցին «Մայր Լեզու» երգը, որմէ ետք խօսք առաւ Ազգային Վարժարանի տնօրէն Պրն. Մանուկ Մանուկեան: Ան անդրադարձաւ հայ գիրքին եւ շեշտեց անոր կարեւորութիւնը՝ սերունդներու ճշգրիտ դաստիարակութեան եւ հոգեմտաւոր զարգացման: Գիրք ունենալն ու զայն ընթերցելը Պրն. Մանուկ համարեց հարստութիւն: Ան յորդորեց նաեւ տօնելի առիթներուն, նուէրներու ընտրութեան համար, յաճախ դիմել հայ գիրքին:



Աւարտին, վարժարանի Ա-Զ աշակերտներուն նուիրուեցան գիրքեր ու խտասալիկներ (CD): Խտասալիկները կը պարունակեն Յովհաննէս Թումանեանի հեքիաթները՝ Բուէթի Ազգային Վարժարանի աշակերտներու ձայնով:

ՀԱՅԿԱԿԱՆ

Հայաստանի Հանրապետությունը՝ ՄԱԿ-ի Պատուոյ Ցանկին Վրայ

Հայաստանի Հանրապետության արտաքին գործոց նախարարության մամլոյ, տեղեկատվութեան եւ հասարակութեան հետ կապի վարչութենէն «Արմէնփրես»-ին յայտնած են, որ Հայաստանի Հանրապետությունը 2016-ին ներառուած է ՄԱԿ-ի պատուոյ ցանկին վրայ՝ կազմակերպութեան պիտոճէին ժամանակին եւ ամբողջութեամբ կատարած անդամավճարներուն համար:

Յունուար 2016-ին Հայաստանի Հանրապետության կառավարութեան կողմէ ՄԱԿ-ի պիտոճէին փոխանցուած է 150.039 ամերիկեան տոլար՝ իբրեւ Հայաստանի Հանրապետության ՄԱԿ-ին անդամակցութեան գծով 2016-ի տարեկան անդամավճար:

Պատուոյ ցանկին վրայ ընդգրկուած են այն անդամ երկիրները, որոնք ընթացիկ տարուան առաջին 30 աշխատանքային օրուան ընթացքին ամբողջութեամբ վճարած են ՄԱԿ-ի պիտոճէին անդամակցութեան գծով ելեւմտական պարտաւորութիւնները: Այս տարի պատուոյ ցանկին վրայ ներառուած են ՄԱԿ-ի 193 անդամ երկիրներէն միայն 27-ը:

«Ազրպէյճանի Յարձակողական Քաղաքականութիւնը Կը Սպառնայ Լեռնային Ղարաբաղի Ժողովուրդի Գոյութեան» Կ'ըսէ Զոհրապ Մնացականեան

Լեռնային Ղարաբաղի ժողովուրդը նուաճեց իր ինքնորոշման իրաւունքը, մինչդեռ Ազրպէյճանի ատելութեան եւ յարձակողական քաղաքականութեան, մարդու իրաւունքներու ոտնահարման մշակոյթը, շարունակուող ռազմատենչութիւնը եւ ԵԱՀԿ-ի Մինսքի խմբակի միջնորդութեամբ խաղաղ բանակցային հոլովոյթի մերժումը կը սպառնայ Լեռնային Ղարաբաղի ժողովուրդի ֆիզիքական գոյութեան: Այդ մասին յայտարարած է ՄԱԿ-ի մէջ Հայաստանի մնայուն ներկայացուցիչ Զոհրապ Մնացականեան՝ ՄԱԿ-ի Ապահովութեան խորհուրդի բաց քննարկումի ընթացքին:

Հայաստանի արտաքին գործոց նախարարութեան փոխանցումով՝ քննարկումը տեղի ունեցած է 15 Փետրուարին եւ կրած է «ՄԱԿ-ի կանոնադրութեան նպատակներու եւ սկզբունքներու նկատմամբ յարգանքը իբրեւ միջազգային խաղաղութեան եւ անվտանգութեան պահպանման առանցքային տարր» խորագիրը:

Դեսպանը կարեւոր նկատած է միջազգային հանրութեան համախմբուած աջակցութիւնը բանակցային հոլովոյթին, որովհետեւ անիկա, ըստ Մնացականեանի, նուազագոյնը զերծ կը պահէ «մերժող կողմը» լուծման սկզբունքներէ շեղելէ:



Անդրադառնալով ինքնիշխանութեան սկզբունքին՝ Հայաստանի դեսպանը նշած է, որ անիկա իր մէջ կը կրէ պատասխանատուութիւն, իսկ անպատասխանատու ինքնիշխանութիւնը կը սպառնայ միջազգային խաղաղութեան եւ անվտանգութեան:

Անոր խօսքով, խաղաղ եւ ներառական հասարակութիւն կառուցելու պետութիւններու պատասխանատուութիւնը նոյնքան կարեւոր է, որքան ինքնիշխանութիւնը:

Մնացականեան շեշտած է, որ այդ նպատակով միջազգային համագործակցութիւնը միջազգային խաղաղութեան պահպանման տեսանկիւնէն ոչ պակաս համոզիչ է:

Վկայակոչելով «Ոճրագործութիւններու վերլուծութիւններու շրջանակը»՝ Հայաստանի դեսպանը եզրափակած է. «Կանխարգիլման, կանուխ նախազգուշացման մեքանիզմներու գործառոյթը եւ վատթարացող իրավիճակներու ազդանշանները ՄԱԿ-ի համակարգ ուղղորդելու կարողութիւնը կենսական նշանակութիւնը ունին»:

Հայաստանի Վրայով Իրանի Կազը Կրնայ Փոխանցուիլ Վրաստան



Թեհրանն ու Թիֆլիսը կը բանակցին Իրանի մէջ արդիւնահանուած շուրջ 200 միլիոն խորանարդ մէթր կազը Հայաստանի տարածքով Վրաստան արտաձելու ծրագիրներուն շուրջ: Ռուսական ԹԱՍՍ լրատու գործակալութեան համաձայն, 16 Փետրուարին Վրաստանի փոխվարչապետ, ուժանիւթի նախարար Քախա Քալաձէի եւ Իրանի քարիւղի արդիւնաբերութեան նախարար Պիժան Նամտար Ջանկանէի միջեւ Թեհրանի մէջ տեղի

ունեցած բանակցութիւններուն աւարտին այս մասին յայտարարած է անոնց մէկ այլ բարձրաստիճան մասնակիցը՝ Իրանի ազգային կազի ընկերութեան ղեկավար Ալիբեգա Քամելին:

Վրաստանի փոխվարչապետը յայտարարած է, որ վրացական կողմը մեծապէս հետաքրքրուած է իրանական կազով՝ դիտել տալով, որ անոր Վրաստան արտածումը պիտի սկսի 21 մարտին:

Իրանցի պաշտօնատարը դիտել տուած է, որ առաջին համաձայնագիրի գործողութեան ժամկետը եօթը ամիս պիտի ըլլայ եւ անիկա հիմք պիտի հանդիսանայ հետագայ համագործակցութեան համար:

Քամելի շեշտած է, որ այս բոլորը ընելէ առաջ Վրաստան Հայաստանէն արտօնութիւն պէտք է առնէ հայկական տարածքով կազի տարանցման համար: Տակաւին յստակ չէ այն, որ թեքնիք իմաստով ինչպէ՛ս կարելի պիտի ըլլայ խողովակաշարերով Իրանէն Հայաստանի տարածքով դէպի Վրաստան կազի արտածումը:

Իրանի հետ կնքուելիք համաձայնագիրին մանրամասնութիւններուն մասին յստակ տեղեկութիւն չկայ Վրաստանի կողմէ: Վրաստանի ուժանիւթի նախարարը ներկայիս կը խօսի ելեկտրականութեան եղանակային մատակարարումներու կարելիութեան մասին, որոնց ընթացքին, ըստ Քալաձէի, Հայաստան տարանցիկ դէր պիտի խաղայ: Ան նշած է, որ իր երկիրը զարնան ու ամրան ելեկտրականութեան եւ ջրային պաշարներու աւելցուք կ'ունենայ, իսկ Իրան՝ մեծ պահանջ, ուստի կարելի է ելեկտրականութիւնը եւ ջրային պաշարները դէպի Իրան արտաձել Հայաստանի վրայով:

Ֆրանսական Միժեն Քաղաքին Մէջ Արգիլուած Է Թրքերէնի Դասաւանդումը

«Արմէնփրես» կը նշէ, որ թրքական «Զաման» օրաթերթը կը հաղորդէ, թէ Ֆրանսայի մայրաքաղաք Փարիզէն հարաւ-արեւելք գտնուող Միժեն շրջանին մէջ թրքերէնի եւ արաբերէնի դասերը անվտանգութեան նկատառումներով դադրեցուած են:

Որոշումը տուած է Միժենի քաղաքապետ Ֆրանսուա Պուշիէն, որ ընդգծած է, թէ Ֆրանսայի մէջ, ուր ահաբեկչական յարձակումէն ետք յայտարարուած է արտակարգ վիճակ, անհրաժեշտ է դպրոցներու անվտանգութիւնը պահել բարձր մակարդակի վրայ:

Անդրադառնալով դպրոցներուն մէջ թրքերէն դասաւանդող ուսուցիչներուն՝ ան ըսած է. «Երբ տնօրէնը դպրոցը չ'ըլլար, կը կարծէ՛ք պետք է թոյլ տանք, որ անձանօթ եւ ֆրանսերէն շատ քիչ գիտցող մէկը առանց ստուգման մուտք գործէ եւ շրջի դպրոցին մէջ»:

Շուրջ 700 թուրք բնակիչ ունեցող Միժենի մէջ թրքական մշակութային ընկերութեան փոխնախագահ Ֆարուք Պըլըք այս որոշումին նկատմամբ իր դժգոհութիւնը յայտնած է տեղական թերթերէն մէկուն մէջ: Ան յայտնած է այն կարծիքը, թէ փորձ կը կատարուի ահաբեկչութեան սպառնալիքի եւ թրքական ու արաբական մշակոյթներու միջեւ կապ ստեղծել: Ան յայտնած է, որ խորապէս վշտացած է, որ դպրոցներուն մէջ հիմնական դասերէն ետք դասաւանդող թրքերէնի դասերը այսուհետեւ արգիլուած պիտի ըլլան:

Երկրաբանութեան Դասախօս Փրոֆ. Համբիկ Մարութեան Կը Ստանայ Աթենքի Ակադեմիայի Մրցանակը

Վերջերս Յունաստանի Ազգային ակադեմիայի հանդիսաւոր նիստի ընթացքին տեղի ունեցաւ 2015-ի պարգէներու յանձնման արարողութիւնը: «Քոնսթանտինոս Քթենաս» պարգեւը յանձնուեցաւ Յունաստանի Երկրաբանական միութեան հիմնադիր անդամ, գիտահետազօտական բազմաբեղուն աշխատանք տարած, երկրաբանութեան դասախօս, Աթենքի համալսարանի փրոֆ. Համբիկ Մարութեանին՝ «Յունաստանի տարածական բաշխումը սառցադաշտային երեւոյթներու շուրջ» աշխատանքին համար:



Սոյն ուսումնասիրութիւնը կը քննէ Յունաստանի մէջ սառոյցներու տարածման հանգրուանները՝ վերջին 300 հազար տարիներուն ընթացքին: Սառոյցները բաւական ծաւալուն եղած են Փինտոսի լեռնաշղթայի, Ողիմպոս լեռան, ինչպէս եւ Պելոպոնէզի եւ Կրետէի լեռնային շրջաններուն վրայ:

Նշենք, որ Մարութեան ծովային եւ ափամերձ երկրաբանութեան տասնեակներով աշխատանքներ եւ հետազօտութիւններ կատարած է Յունաստանի մէջ, նաեւ մասնակցած է օտար երկիրներու գիտահետազօտական աշխատանքներու խմբակներու մէջ:

ՄԻՋԱԶԳԱՅԻՆ

«Եթե Թուրքիան Ռմբակոծուի, Ապա Այդ Ռմբակոծումին Քառապատիկով Պիտի Հակադարձենք» Կ'ըսէ Էրտողան

Թուրքիոյ նախագահ Ռեճեփ Թայիփ Էրտողան Թուրքիոյ Հանրապետութեան նահանգներու տեղական պատասխանատուներուն առջեւ իր արտասանած խօսքին մէջ յայտնեց. «Սուրիական տագնապը Սուրիոյ մէջ Ռուսիոյ զինուորական միջամտութենէն ետք խորացաւ»: «Անիրաւող վարչակարգերուն դիմակը ինկաւ եւ աշխարհը գիտցաւ այն, ինչ կը կատարենք կրօնի եւ մարդկութեան մէջ մեր եղբայրներուն համար», ըսաւ ան՝ աւելցնելով. «Թուրքիա մարդկայնականութեան դասեր կու տայ, եւ աշխարհին մարդասիրական աշխատանքի բնորդ կու տայ»:

«Ռուսիան Սուրիոյ մէջ պատերազմական ոճիր կը գործէ եւ մեղսակից կը դառնայ Սուրիոյ նախագահ Պաշշար Ասատի վարչակարգին՝ սուրիացի ժողովուրդին դէմ ոճիրներուն», ըսաւ ան: Անդրադառնալով Սուրիոյ քրտական Ժողովրդավարական միութիւն կուսակցութեան՝ Էրտողան ըսաւ. «Ամերիկան տակաւին կը դժուարանայ կուսակցութիւնը նկատել ահաբեկչական, հակառակ այդ հարցին յստակութեան»: «Ամերիկան հրապարակաւ բան մը կը յայտարարէ եւ փակ դռներու ետին այլ բան կ'ըսէ», աւելցուց ան:

«Մենք Սուրիոյ մէջ ժողովրդավարութիւնն ու օրինականութիւնը կը պաշտպանենք եւ պիտի շարունակենք մնալ սուրիացի ժողովուրդին կողքին: Մենք ահաբեկիչներուն միջեւ խտրութիւն չենք դներ», ըսաւ Էրտողան՝ աւելցնելով. «Ուաշինկթըն ահաբեկիչները կը բնորոշէ «լաւ ահաբեկիչ» եւ «վատ ահաբեկիչ» պիտակներով»:

«Միացեալ Նահանգներ կը խօսին ապահովական գօտիի մը մասին, որ թռիչքներու արգիլեալ գօտի չէ: Այդպիսով, անոնք սուրիական վարչակարգին կ'արտօսեն օդային հարուածներ հասցնել եւ սպաննել քաղաքայիները», ըսաւ ան:

Էրտողան շեշտեց, որ «Եթե Թուրքիան ռմբակոծումի ենթարկուի, ապա այդ ռմբակոծումին քառապատիկով պիտի հակադարձէ»՝ նշելով, որ թրքական հրետանիին կողմէ կատարուած ռմբակոծումը «բախումի կանոններու եւ միջազգային օրէնքի ծիրին մէջ է»:

«Ամերիկան կը շարունակէ Սուրիոյ մէջ ահաբեկիչներուն աջակցիլ՝ մատակարարելով ամերիկեան զէնքեր, որոնք վերջաւորութեան Թուրքիոյ մէջ ահաբեկիչներուն ձեռքը կ'անցնին: Կուրուքիւնն է միայն, որ Ամերիկային չ'արտօսէր Սուրիոյ մէջ իսկական ահաբեկիչները տեսնել», նշեց Թուրքիոյ նախագահը՝ աւելցնելով. «Ուաշինկթըն պէտք է Թուրքիոյ եւ քրտական ահաբեկչական ժողովուրդի պաշտպանութեան ուժերուն միջեւ ընտրանք կատարէ»:

«Այն ինչ որ Ռուսիան այսօր Սուրիոյ մէջ կը կատարէ, բռնագրաւումի յստակ փորձ մըն է եւ ոչ թէ ահաբեկչական ՏԱՀԵՇ-ի դէմ պայքար», ըսաւ Էրտողան:

Նշենք, որ Էրտողան Չորեքշաբթի օր իր նախապէս նախատեսուած աշխատանքները չեղեալ յայտարարելով երեկոյեան ժամը 6:00-ին Թուրքիոյ Ազգային անվտանգութեան խորհուրդը հրաւիրեց Սուրիոյ զարգացումներուն հարցով ժողովի մը: Մինչ այդ, թրքական «Տոհան» լրատու գործակալութիւնը հաղորդեց, որ թրքական բանակը յաւելեալ ուժեր ուղարկած է Սուրիոյ հետ սահման:

Միւս կողմէ, Թուրքիոյ փոխվարչապետ Եալչըն Աքտոզան յայտարարեց, որ Անգարա կ'ուզէ Սուրիոյ մէջ 10 քմ խորութեամբ ապահովական գոտի մը, որ կը ներառէ Ազեզ քաղաքը: Այդ յայտարարութենէն ետք, Ռուսիոյ արտաքին գործոց նախարարութիւնը հաղորդագրութիւն մը հրապարակելով յայտարարեց. «Սուրիոյ մէջ առանց սուրիական կառավարութեան եւ ՄԱԿ-ի արտօնութեան ապահովական գոտիի մը հաստատումը բացառուած է»:

Արաբ Ականաւոր Քաղաքական Վերլուծաբան Մոհամետ Հասանէյն Հայքալ Մահացաւ

Չորեքշաբթի օր մահացաւ եգիպտացի գրող, լրագրող եւ ականաւոր քաղաքական վերլուծաբան Մոհամետ Հասանէյն Հայքալ: Ան ապրեցաւ 93 տարի, որոնցմէ 75-ը նուիրեց մամուլի ապարտեզին:



Հայքալ հոշակաւոր դարձաւ իբրեւ գլխաւոր խմբագիրը եգիպտական «Ահրամ» օրաթերթին, որ իր ղեկավարութեան տակ դարձաւ արաբական աշխարհի մեծագոյն օրաթերթը: Ան մտերիմ գործակիցն էր Եգիպտոսի նախագահ ժամաւ Ապտել Նասերի եւ հետագային վերջինիս իշխանութեան օրով վարեց ազգային ծրագրումի նախարարի պաշտօնը: Ապտել Նասերի մահէն ետք ան կարեւոր դերակատարութիւն ունեցաւ Անուար Սատաթի իշխանութեան ամրապնդման գործին մէջ, սակայն Սատաթի հետ անոր յարաբերութիւնները խզուեցան, երբ «Ահրամ» քննադատեց նախագահը: Ան հարիւրաւոր ուրիշ անձնաւորութիւններու կողքին ձերբակալուեցաւ իբրեւ Սատաթի քաղաքականութեան, ներառեալ՝ Իսրայէլի հետ խաղաղութեան համաձայնագիրին եւ տնտեսական ազատականութեան դէմ վտանգ մը: Ան ազատ արձակուեցաւ Հիւսնի Մուպարաքի իշխանութեան գալէն ետք, 2000 թուականներուն վարեց պատկերասփիւռային յայտագիր մը եւ շարունակեց յօդուածագրութիւնը:

Շրջանային հարցերու վերաբերեալ Հայքալի տեսակէտները մեծ յարգանք կը վայելէին բազմաթիւ արաբ ղեկավարներու մօտ:

Մահացած է ՄԱԿ-ի Նախկին Ընդհանուր Քարտուղար Պութրոս Պութրոս Ղալին

93 տարեկանին մահացած է ՄԱԿ-ի նախկին ընդհանուր քարտուղար Պութրոս Պութրոս Ղալին՝ Գահիրէի մէջ, կը հաղորդէ «Պի.Պի.Մի.»:

Պութրոս Ղալի ՄԱԿ-ի ընդհանուր քարտուղարի պաշտօնը վարած է 1992-1996 ժամանակաշրջանին: Անոր պաշտօնավարման ժամանակահատուածը հակասական գնահատականներու արժանացած է 1994-ին Ռուանտայի ցեղասպանութեան եւ Անկոլայի քաղաքացիական պատերազմին մէջ ՄԱԿ-ի սպասողական պահուածքին պատճառով:

ՄԱԿ-էն հեռանալէ ետք՝ 1998-էն 2002 թուականներուն Պութրոս Ղալի ստանձնած է Ֆրանսախօս երկիրներու միջազգային կազմակերպութեան ընդհանուր քարտուղարի պաշտօնը:

2004-ին նշանակուած է Եգիպտոսի Մարդու իրաւունքներու խորհուրդի նախագահ:

ՔԱԿ. «Զինեալ Ղիմադրութիւն՝ Մինչեւ Քիւրտիստանի Ազատագրումը»

Քրտական աշխատաւորական կուսակցութեան՝ ՔԱԿ-ի զինեալ թելի ղեկավարներէն Մուրատ Քարայըլան «ՌԻԱ Նովոսթի»-ի հետ հարցազրոյցի մը ընթացքին յայտարարած է, որ ՔԱԿ մտադիր է Թուրքիոյ մէջ զինեալ ղիմադրութիւնը շարունակել, մինչեւ որ ամբողջ քիւրտ ժողովուրդը անկախութիւն եւ ազատութիւն ձեռք բերէ:

Ան յայտնած է, որ ՔԱԿ-ը կրնայ քիւրտերուն դէմ Թուրքիոյ իշխանութիւններու ճնշումներուն հակադարձել քաղաքներուն մէջ սկսելով մարտական գործողութիւններ:

«Հակառակ անոր որ մինչեւ հիմա մեր գործողութիւններուն համար ընտրած ենք գիւղական վայրերը, սակայն, ներկայ պայմանները կը թելադրեն մարտավարութիւնը փոխելու անհրաժեշտութիւնը», ըսած է Քարայըլան:

Ըստ անոր, թրքական պետութիւնը ժողովրդավարական ինքնավարութիւն ստեղծելու համար պայքարող քիւրտերուն դէմ լայնածաւալ պատերազմ կը վարէ:

«Մենք զէնքը վար պիտի դնենք այն ժամանակ, երբ թշնամական յարձակումները կը դադրին եւ մեր ժողովուրդը ազատութիւն ու անկախութիւն ձեռք կը բերէ: Մենք մտադիր ենք Քիւրտիստանի մէջ զինեալ ղիմադրութիւնը շարունակել, այնքան ատեն որ մեր ղեկավար Ապտիլլա Օճալանն ու ամբողջ ժողովուրդը ազատութիւն եւ անկախութիւն ձեռք չեն բերած», ըսած է ան:

Մուրատ Քարայըլան յայտարարած է, որ իրենք բազմաթիւ ապացոյցներ ունին, թէ Թուրքիան, Մէուտական Արաբիան եւ Քաթարը բազմակողմանի աջակցութիւն ցուցաբերած են Քայիտա ահաբեկչական խմբաւորումէն սերած Մուրիոյ ժիհատական կազմակերպութիւններուն:

«Քիւրտերը փաստագրական ապացոյցներ ունին, թէ Թուրքիան կ'աջակցի ՏԱՀԵՇ-ի, Ժապհաթ Նուսրայի եւ այլ արմատական խմբաւորումներուն, այդ կապը կը բացատրուի գաղափարական հարազատութեամբ, ինչպէս նաեւ ընդհանուր ռազմավարական շահերով: Թուրքիոյ իշխող Արդարութիւն եւ բարգաւաճում կուսակցութիւնը, Քայիտայի սալաֆական խմբաւորումներու եւ Մէուտական Արաբիոյ ու Քաթարի հետ զինած է Մուրիոյ մէջ արմատական սալաֆական խմբաւորումները, որոնք իրենց բոլոր գործողութիւնները կը կառուցեն իսլամական օրէնքին վրայ: Մուրիոյ քիւրտերը՝ ժողովրդավարական միութիւն կուսակցութեան ներկայացուցիչները եւ քրտական այլ ուժերը խիստ տարբեր են անոնցմէ կեանքի եւ պետական կառոյցին նկատմամբ իրենց ժամանակակից, աշխարհիկ հայեացքներուն համար, եւ ճիշդ ատոր մէջ կը կայանայ այն ատելութեան պատճառը, որ ժիհատականները կը տածեն սուրիացի քիւրտերուն նկատմամբ:

«Սկիզբէն ի վեր Թուրքիան սնած, ամէն ձեւով աջակցած է ՏԱՀԵՇ-ին եւ Ժապհաթ Նուսրային: Մենք հարիւր առ հարիւր համոզուած ենք այն բանին, որ Թուրքիան կապեր ունի ՏԱՀԵՇ-ի հետ: Աւելի՛ն, մենք ատիկա տեսած ենք սեփական աչքերով: Բազմիցս նկարած ենք թրքական իշխանութեան վերնախաւի ներկայացուցիչներու հանդիպումները ՏԱՀԵՇ-ի անդամներուն հետ: Ռոժավայի (սուրիական Քիւրտիստանի) տարածք Ժապհաթ Նուսրայի եւ ՏԱՀԵՇ-ի զինեալները անցած են Թուրքիոյ տարածքէն», նշած է ՔԱԿ-ի ղեկավարը:

Մուրատ Քարայըլան ՔԱԿ-ը կը ղեկավարէ 1999-էն՝ Ապտիլլա Օճալանի ձերբակալումէն ի վեր:

ԱՆՆԱՆԱՐԶ

Փետրուարեան Ապստամբութեան Երէկն Ու Այսօրը (95-Ամեակին Առիթով)



95 տարի ետք պատմական դիպաշարի մը հոլովոյթն ու բաղդատականը չէ որ կ'ուզենք կատարել, որքան տուեալ եղելութենէն մեզի ժառանգ մնացած խորհուրդներու ընդգծումը:

Խորհուրդներ, որոնք ցարդ պահած են իրենց այժմեականութիւնը, իմաստներն ու արժեհամակարգային հասկացողութիւնները:

Արդարեւ, ժամանակակից հայոց պատմութեան ճակատագրորոշ մէկ փուլին, երբ բուռ մը հայութիւն, աշխարհաքաղաքական պիղծ ու ստոր, համայնակուլ

խաղերու եւ խօլ մրցակցութիւններու պատճառով կը կորսնցնէր իր քաղաքական անկախութիւնն ու ազատ ապրելու ամէն հնարաւորութիւն, դէմ յանդիման կը գտնուէր ահաւոր կացութիւններու, այս անգամ՝ ֆիզիքական ստոյգ այլ բնաջնջումի, որ իր կարգին Հայոց ցեղասպանութեան մէկ այլ տարբերակը պիտի հանդիսանար:

Փաստօրէն, Հայաստանի խորհրդայնացումէն (2 դեկտեմբեր 1920) մինչեւ Փետրուարեան ապստամբութեան բռնկումի թուական, արդէն այդ կարճ ժամանակամիջոցին յստակ կը դառնար համայնավար խենեշ վարչակարգին ուղղակի մտադրութիւնը՝ շարունակել թուրք զազրութեան ցեղասպանութիւնը, այլապէս սպանդի ենթարկելով հայոց մնացորդացը:

Հակառակ լրգրանեան այսպէս ըսած «հաւաստիացումներուն» եւ Դրոյի հետ ուղղակի համաձայնութեան՝ հայութիւնը գերծ կացուցել արինահեղութենէ, այլապէս վարչակարգի փոփոխութիւնը կատարել խաղաղ պայմաններու մէջ, կը պատահէր անխուսափելի՝ ամէն գնով խեղդել ազգային ըմբոստութիւն, ընդդիմութիւն եւ ազատատենչ մօտեցում՝ հաւատարիմ մնալու համար լենինեան վատոգի վարքագիծին ու անոր սեւաթոյր գաղափարախօսութեան՝ չինայել ոչ մէկ միջոց, հասնելու համար ազգերու «համերաշխութեան», «հաւասարութեան» եւ «եղբայրութեան»:

18 Փետրուար 1921:

Ստուգապէս կարելի է ըսել, որ իր գաղափարական արժեքային համակարգով թէ զինուորական յաջողութեամբ այս թուականը եղաւ անկիւնադարձային, այն առումով, որ իր դէմ պարտադրուած նորովի սպանդին դէմ հայութիւնը կրկին անգամ ապստամբեցաւ եւ իր ազգային արժանապատուութեան սուրբ դրօշը պարզեց՝ վառ պահելու համար հետագայ սերունդներու ազգային գիտակցութիւնը, Արարատը պաշտելու հաւատամքն ու արժանահաւատ կեանք մը վարելու եզակի ըմբռնումը:

Յայտնապէս հայ ժողովուրդի մէկութեան գաղափարին, ազգային ոգեկան հարստութիւններուն եւ միասնականութեան ամէնէն սրբազան ապրումն էր, որ ինքզինք կը դրսեւորէր եւ իր բարձրագոյն ձայնը լսելի կը դարձնէր ընդդէմ պոլշեւիկ-համայնավար-հայատեաց Կասեաններու թէ Նուրիջանեաններու, որոնք իրենց յեղկոմեան ծառայութիւններուն յագուրդ տալու համար, սպանդի ենթարկեցին հայութեան լաւագոյն ընտրանին՝ քաղաքական գործիչը, հայդուկը, սպարապետը, հողամշակն ու ազնիւ ուսուցիչը:

Եւ եթէ երբեք հայութեան բնածին եւ առողջ հայրենապաշտի բնագոյր արագօրէն չըրցավառէր 95 տարի առաջ ճիշդ այս օրը, հայութեան լինելութեան, գոյատեւման թէ հայրենիքի փրկութեան ամէն յոյս ե լոյս կորսուած պիտի ըլլային անդարձ, որովհետեւ հետագայ բոլոր քաղաքական, մշակութային թէ ընկերային զարգացումները՝ մինչեւ արցախեան գոյամարտ, ապացուցեցին այն ճշմարիտ եւ անզերագանցելի

գաղափարայնությունը, թե՛ ազգերը կ'ապրին եւ կը գոյատևեն միայն իրենց քաղաքական անկախութեամբ, ինքնուրոյն եւ անկաշկանդ պետական մտածողութեամբ, հերոսական սխրանքներով, մշակութային նուաճումներով եւ առանձնաբար՝ միասնական հոգեկանութեամբ:

Արդեօք հայութեան երկկուան միակամ կեցուածքին, պոռթկումին, ցասումին, ազգային գիտակցական ոգիին եւ գոհողութեան արդիւնք չէի՞ն հազարաւոր հայերու ստոյգ սպանդէ փրկությունը, համայնավար հրէշներու ճիրաններէն հայ պետական մարդոց թէ՛ նուիրեալ ֆետայիներու բանտերէ՛ ազատությունը, կողոպուտի, թալանի թէ՛ սանձարձակ յափշտակություններու կասեցումը:

Միթէ՛ Փետրուարեան ապստամբութեան ազատատենչի ու հայրենակերտի երկկուան գիտակցությունը չէ՞ր, որ հայու ներաշխարհին մէջ վառ պահեց ըմբոստացումի պահուածքն ու ընդդիմանալու ոգեկան եզակի առանձնայատկությունը:

Այո՛, բազմիցս շեշտած ենք, թէ՛ Փետրուարեան ապստամբութեան նկատմամբ դրսեւորուած ամէն ապագային կողմնորոշում կամ թիւր մեկնաբանություն բացառաբար կը ծառայէ հայութեան թշնամի բոլոր ուժերուն, որոնք այսպէս կամ այնպէս եւ տարբեր ժամանակներու կը փորձեն հարուածել հայ ժողովուրդի միասնականությունը՝ քանդելու համար հայրենիքն ու Արեւմտահայաստանի ազատագրութեան հայու հաւատամքն ու դարաւոր երազը:

Միւս կողմէ, ցարդ հայ պետական թէ՛ ակադեմական շրջանակներ, պատմաբաններ թէ՛ քաղաքական վերլուծաբաններ ինչո՞ւ կ'ուրանան, չեն յստակացներ եւ կամ խորքային արժեւորման չեն ենթարկեր տուեալ թուականը, որպէսզի սերունդներ միանգամընդմիջտ կարենան ըմբռնել նման արարքի մը գաղափարախօսական իմաստն ու խորհուրդը:

Ի դէպ, կը կարդանք եւ կը հանդիպինք, թէ՛ եւ հագուադէպօրէն, հայրենի թէ՛ սփիւռքահայ ազնուահոգի պատմաբաններու վերլուծություններուն եւ անաչառ դատողություններուն, որոնք վեր կ'առնեն եւ կը շեշտեն հայոց ժամանակակից պատմութեան տուեալ փուլի համապարփակ իմացումն ու կարեւորությունը՝ պարզապէս հեռու մնալու համար տգիտութեան առթած գովերգութենէն եւ մոլորութենէն:

Միւս կողմէ, պէտք է ընդգծել, թէ՛ հայոց պատմագրությունը արձանագրած է Փետրուարեան ապստամբութեան յուշագրական, հրապարագրական թէ՛ վկայություններու ամբողջ տեսադաշտը, որուն համար միշտ ալ շնորհակալ եղած են իրերայաջորդ սերունդներ:

Անցնելով այսօրուան հայ իրականութեան մէջ գոյություն ունեցող տարբեր ընկերային դժուարություններուն եւ քաղաքական բացայայտ թերացումներուն, ապագային կողմնորոշումներուն եւ շատ անգամ սադրիչ վարքագիծերուն, յստակ կը դառնայ իրողություն մը անստեղծ, թէ՛ այնքան ատեն որ հայությունը իր պետական մտածողութեամբ, հայ քաղաքական մտքի հասունութեամբ եւ ազգային հայեցակարգերու առաւել հաստատագրումով ամէն քայլափոխի ինքզինք չի բարեկարգեր, փոփոխություններու չի ձեռնարկեր, յառաջադէմ եւ կենսունակ ազգային ծրագիրներու չի նախաձեռներ, բայց մանաւանդ՝ մօտիկ անցեալի պատմութենէն դասեր քաղելու պատրաստակամություն չի ցուցաբերեր, պիտի գտնուի տարածամ ու անախորժ կացություններու դէմ յանդիման եւ դառնայ համաշխարհային գերհօր սադրանքներու ու քաղաքական խաղերու ենթակայ, այլապէս քանդելով պետականաշինութեան ամէն գործընթացի առաջադրություն եւ երազանք:

Օրին, Փետրուարեան ապստամբութեամբ հայությունը ինքնեկ երկնեց իր գաղափարական մեկութեան հրաշալի հաւատամքը, այսօր հայությունը պարտաւոր է առաւել համախմբուիլ հայոց պետութեան շուրջ եւ երկնել մերօրեայ կեանքի ազգային համագործակցութեան ամէնէն վաւերական արտայայտությունը՝ ներկայ ժամանակներու Ազգային փրկութեան կոմիտէն, որուն յենարանը կրնայ ըլլալ ազգը համակ՝ իր բոլոր շերտերով եւ գոյներով:

ՀԱՄԱԻՎ ԴԻՆԱԼԵԱՆ

ԼՈՒՐԵՐ ԳԱՂՈՒԹՆԵՐԷՆ

Ոչ եւս է Բազմավաստակ Բեմադրիչ Եւ Դերասան Պերճ Ֆազլեան

Երկուշաբթի, 15 Փետրուարին իր մահկանացուն կնքեց վաստակաւոր բեմադրիչ եւ դերասան Պերճ Ֆազլեան՝ լիբանանեան ֆիլմարուեստի եւ թատերական աշխարհին կտակելով մեծ ու լուսաշող աւանդ, զոր ան կերտած է աւելի քան 6 տասնեակ տարիներու ժրջան ու հետեւողական աշխատանքով, տաղանդով ու մասնագիտական հմտութեամբ: Թատերական եւ ֆիլմարուեստի աշխարհին մէջ համագործակցած է տարբեր անձնաւորութիւններու հետ, սակայն յատկանշական է անոր կապը Ռահպանի եղբայրներուն հետ, որոնց հետ աշխատանքի ուղին սկսած է 1964-ին, երբ ան բեմադրած է նշանաւոր արուեստագետ Ֆէյրուզի մասնակցութեամբ Ասի եւ Մանսուր Ռահպանիներու «Մատանի ծախող» երաժշտախառն թատերգութիւնը:



Պերճ Ֆազլեան ծնած է 4 դեկտեմբեր 1926-ին, Կոստանդնուպոլսոյ մէջ: Աւարտած տեղւոյն Միսիթաբեան եւ Կեդրոնական վարժարանները, քաղաքապետարանի թատրոնի դասընթացները: 1944-էն մասնակցած է նոյն թատրոնի ներկայացումներուն: 1965-67 թուականներուն բարձրագոյն ուսում ստացած է Փարիզի մէջ:

1945-ին բեմադրած է իր անդրանիկ թատերախաղը, 1951-ին եկած է Պէյրութ, ուր 1959-ին հիմնած է Վահրամ Փափագեան թատերախումբը, զոր ղեկավարած է մինչեւ 1971 թուական: 1963-ին հիմնած է Լիբանանեան արաբական թատրոնը, 1971-ին՝ «Ազատ բեմ» սեփական թատերախումբը: 1976-ին հաստատուած է Մոնրէալ, ուր յառաջացուցած է «Հայ բեմ» թատերախումբը, որ զանազան ներկայացումներով հանդէս եկած է Քանադայի եւ Միացեալ Նահանգներու տարբեր քաղաքներուն, ինչպէս նաեւ Լոստոնի մէջ:

Մոլիերի «Ազահը» գործին բեմադրութեամբ իր վրայ հրաւիրած է լուսարձակները. լիբանանեան եւ լիբանանահայ կեանքին մէջ անոր բեմադրութիւններէն կարելի է յիշել Իսամ Մահֆուզի «Չանգալախթը», Մ. Փանէոլի «Թուպագ», Լ. Շանթի «Հին աստուածներ», Յ. Պարոնեանի «Պաղտասար աղբար», Կ. Կոլտոնիի «Երկու տիրոջ ծառան», Վ. Շէքսպիրի «Ամառնային գիշերուան երազը», Մոլիերի «Թարթիւֆ» («Խաչագողը»), Ն. Կոկոլի «Ամուսնութիւն», Կապրիէլ Պուսթանիի «Ժրպարան Խալիլ Ժրպարան»-ը եւ բազմաթիւ ուրիշներ: Աշխատած է լիբանանցի նշանաւոր արուեստագէտներու հետ՝ Ռեմոն Ժրպարա, Նեպիլ Ապու Հըսըն, Ֆիլիփ Աքիքի, Ֆրիալ Քարիմ եւ շատ ուրիշներ:

Դերերով հանդէս եկած է իր բեմադրած ներկայացումներուն, ինչպէս նաեւ լիբանանեան եւ եգիպտական ժապաւէններու մէջ: Հայկական պատկերասփիւռային թատրոնին համար բեմադրած է «Քարիտեզճին» (ըստ Երուխանի «Չուկին փոխարէն» պատմուածքին, 1986 թուականին): Իր մահով Լիբանանը կը կորսնցնէ իր կեանքին մեծամասնութիւնը թատրոնին եւ շարժապատկերին նուիրած անձնաւորութիւն մը, իսկ լիբանանահայութիւնը՝ դերասանէն ու բեմադրիչէն աւելի լիբանանեան իրականութեան մէջ հայութեան անունը բարձր պահած անձնաւորութիւն մը:

Ժրնեի Ս. Յակոբ Եկեղեցւոյ «Հաւատամք» Երգչախումբին Անդրանիկ Ելոյթը



Ժրնեի Ս. Յակոբ Եկեղեցւոյ տարեգրութեան մէջ յիշատակելի պիտի մնայ «ՀԱԻԱՏԱՄՔ» երգչախումբին անդրանիկ ելոյթը՝ կիրակի, 31 յունուար 2016-ին, Ս. պատարագի աւարտին, Եկեղեցւոյ ներքնասրահին մէջ, որ նեղ կու գար շուրջ ութսուն ներկաներուն:

Ս. պատարագի երգեցողութիւնը կատարողներու խումբի պատասխանատուն՝ Արմէն սրկ. Մարգարեան իր բացման խօսքին մէջ յայտնեց, թէ այս երգչախումբը Եկեղեցւոյ գլխաւոր հարստութիւնն է, եւ մասնակիցները սիրոյ գլխաւոր օրինակներն են Աստուծոյ փառաբանութեան մէջ:

Եկմալեանի «Հայր Մեր»-ի յոտընկայս ունկնդրութենէ ետք, անմահն Կոմիտասէն յաջորդաբար ներկայացուեցաւ, երգչախումբի խմբավար՝ արհեստավարժ մենակատար՝ Խաչիկ Մատթէոսեանի մասնակցութեամբ «Հորովել»-ը, ապա «Հոյ նագան իմ» խմբերգը: Երգչախումբի դաշնակահար երաժիշտ՝ Սալէմ Պալի նուագեց «Վաղարշապատի պարը», իսկ Իսկանտէր Կիրակոսեան մեներգեց «Մարերի հովին մեռնեմ»ը: Սոնա Յակոբեան ասմունքեց՝ Պարոյր Սեւակէն՝ «Քիչ ենք, բայց հայ ենք», Արմէն սարկաւազ մեներգեց՝ Էտկար Յովհաննէսեանի «Արփա Սեւան»-ը: Յայտագիրը իր աւարտին հասաւ «Ամէն հայի սրտից բխած» հայրապետական մաղթանքով:

Վերոյիշեալ մենակատարներու կողքին, երգչախումբին մաս կը կազմեն նաեւ Քրիստինա Քիւքճեան, Սիմա Փափագեան եւ Բաֆֆի Կիրակոսեան:

Զուիցերիոյ հայոց թեմի տեղապահ Գուսան վրդ. Ալճանեան իր օրհնութեան խօսքին մէջ բարձր գնահատեց այս աշխատանքը՝ յիշատակելով, թէ շուրջ յիսուն տարիներ առաջ այս Եկեղեցւոյ հիմնադիրները տեսիլք ունէին իրենց կատարժ մեծ գործին, որուն արդիւնքով բուռ մը հայեր ուր ալ ապրին, իրենց մշակոյթը բարձր կը պահեն:

Կանաչ ճանապարհ եւ յարատեւութիւն կը մաղթենք զուիցերահայութեան այս կարեւոր նախաձեռնութեան:

Վարդանանցի Տօնակատարութիւնը Ալֆորվիլի Մէջ

Փետրուար 5-ին, Ալֆորվիլի Հայ աւետարանական Եկեղեցւոյ մէջ տեղի ունեցաւ Վարդանանց տօնակատարութիւն: Բացման խօսքը արտասանեց վեր. Ժիլպեր Լեւոնեան, որ հաստատեց, թէ հերոս Վարդան զոհեց իր կեանքը, որպէսզի կարենանք շարունակել ապրիլ որպէս հայ, փրկել քրիստոնէական հաւատքը, հայոց լեզուն եւ ազգային արժանապատուութիւնը:

Զեռնարկի ընթացքին գործադրուեցաւ գեղարուեստական յայտագիր:

Օրուան պատգամախօս Սիրան Սվաճեան, որ իրարու մօտեցուց անցեալն ու ներկան եւ փորձեց ներկայացնել Վարդանի եւ Վասակի տեսանկիւններուն դրականն ու բացասականը: Ան

յայտնեց, թե այն նպատակը, որուն համար պէտք է զոհենք մեր կեանքը, հայկական ինքնութեան եւ հայոց լեզուի պաշտպանութիւնն է, ինչպէս նաեւ՝ քրիստոնէական մեր հաւատքը:

Սրբոց Վարդանանց Տօնակատարութիւնը Սամուէլ Մուրատեան Վարժարանէն Ներս



Փետրուար 7-ին, «Սամուէլ Մուրատեան» վարժարանին մէջ տեղի ունեցաւ Վարդանանց տօնակատարութիւն:

Օրուան բանախօսն էր վարժարանի տեսուչ Յարութիւն վրդ. Պզտիկեան, որ անդրադարձաւ Վարդանանց հերոսամարտի բարոյական եւ զինուորական փայլուն յաղթանակին, պատմականօրէն բացատրելով, թէ ինչպէ՛ս Աւարայրի հերոսական ճակատամարտէն ետք, Հմայեակ

Մամիկոնեան՝ Վարդանի եղբայրը, հայոց ցրուած բանակը վերակազմելով՝ սկիզբ տուաւ Բերդերու պատերազմին, փոքրաթիւ գունդերով ֆետայական ճակատամարտ մղելով պարսից բանակին դէմ:

Հանդիսութեան գեղարուեստական բաժինով ելոյթ ունեցան մանկապարտէզի եւ միջնակարգի աշակերտները, որոնք մեկնաբանեցին Վարդանանց դասական երգեր եւ խմբերգներ:

Զօրի Բալայեանի 80-ամեակին Նուիրուած Երեկոյ

Փետրուար 4-ին Մոսկուայի Արուեստի աշխատողներու կեդրոնական տան մէջ տեղի ունեցաւ հայ գրող, հասարակական եւ քաղաքական գործիչ, լրագրող եւ ճանապարհորդ Զօրի Բալայեանի 80-ամեակին նուիրուած երեկոյ:

Բացման խօսքով հանդէս եկաւ Հայաստանի մշակոյթի նախարար Յասմիկ Պօղոսեան, որ անդրադարձաւ Բալայեանի գործունէութեան՝ ընդգծելով անոր բացառիկ դերակատարութիւնը՝ որպէս մշակոյթի նուիրեալի եւ հասարակական գործիչի Հայաստանի մէջ եւ սփիւռքի տարածքին:



Հայաստանի դեսպան Օլէկ Եսայեան իր խօսքին մէջ նշեց, որ Զօրի Բալայեանին նուիրուած սոյն հանդիպումը կարելոր է ռուսական մտաւորականութեան եւ տեղի հայութեան համար: Ան ընդգծեց, որ Բալայեան իր գործունէութեամբ հայ ժողովուրդի ազգային արժանապատուութեան եւ անսահման հայրենասիրութեան խորհրդանիշն է:

Ձեռնարկի ընթացքին գործադրուեցաւ գեղարուեստական յայտագիր, նաեւ տեղի ունեցաւ Բալայեանի ստեղծագործութիւններու հաւաքածոյի ուրջ հատորներուն շնորհահանդէսը:

ՄՇԱԿՈՒԹԱՅԻՆ

Ներկայացում Վահան Յովհաննիսեանի Երկու Գիրքերուն

Համազգայինի Արեւմտեան Ամերիկայի Շրջանային վարչութեան, «Սարդարապատ» գրախանութին եւ «Ասպարէզ» օրաթերթին կազմակերպութեամբ տեղի ունեցաւ Վահան Յովհաննիսեանի «Մանտիլիոն» ու «Մայրամուտ, որը պէտք է կասեցնել» գիրքերուն ներկայացումը՝ երեքշաբթի, 19 յունուար 2016-ին, Կլենտլիի Երիտասարդական կեդրոնին մէջ, ներկայութեամբ գրասէրներու հոյլի մը:

«Ասպարէզ»-ի խմբագիր Արօ Պօղիկեան ելոյթ ունեցաւ հակիրճ բացման խօսքով մը եւ անդրադարձաւ Վահան Յովհաննիսեանի կեանքին՝ նշելով, որ Վահանը երիտասարդական աւիւնով լի, անսպառ ներուժով օժտուած, միշտ կայտառ ու աշխոյժ, լայն մտահորիզոնով եւ գիտելիքներու հսկայ շտեմարանով անձ մըն էր: Խմբագիր Պօղիկեան պատիւը ունեցած էր Վահանին հետ մօտէն գործակցելու, յատկապէս 1989-1994 թուականներուն, Դաշնակցութեան գործունէութիւնը Հայաստանի ու Արցախի մէջ ծաւալելու ընթացքին՝ կիսելով անոր հետ պատմական նշանակալի պահեր:

Ծանօթ է, որ Վահան Յովհաննիսեան հալածուած ու բանտարկուած էր, ապա բանտի ճաղերէն դուրս՝ եղած էր Դաշնակցութեան գործիչ ու Գերագոյն մարմինի անդամ: Քաղաքական գործիչի իր հանգամանքով ան այցելած էր բազմաթիւ երկիրներ, եղած էր խորհրդարանի անդամ կամ նախագահի խորհրդատու, մինչեւ իսկ՝ Գերմանիոյ մէջ Հայաստանի դեսպան՝ շատ կարճ ժամանակով մը, որ ընդհատուեցաւ Վահանի վաղահաս մահուան պատճառով:

Դուրս. Ռուբինա Փիրումեան հրաւիրուած էր ներկայացնելու «Մանտիլիոն»-ը, որ ռուսերէնով գրուած, սակայն հայերէնի ու անգլերէնի թարգմանուած է:

Դուրս. Փիրումեան անդրադարձաւ գիրքի բովանդակութեան՝ ամբողջական պատկերացում մը տալով «Մանտիլիոն»-ին մասին, որ հինգ հարիւր էջ հաշուող լայնածաւալ վեպ մըն է:

Յաջորդ բանախօսն էր ՀՅԴ Բիւրոյի անդամ եւ քաղաքական ներկայացուցիչ Արմէն Ռուստամեան, որ «Մայրամուտ, որը պէտք է կասեցնել» հատորին ընդմէջէն՝ դիպուկ ու անմիջական պատկերներով ներկայացուց Վահանը, ըլլալով անոր գաղափարի ընկերը, գաղափարական եւ քաղաքական դաշտին վրայ հալածուած ճակատագրակիցը՝ մնալով մի՛ շտ պատնէշի վրայ:

Թէ է՞րբ եւ ինչպէ՞ս Վահան կրցած էր ժամանակ գտնել գրելու եւ ստեղծագործելու՝ առեղծուածային կը թուէր Արմէն Ռուստամեանի համար, որովհետեւ, անոր խօսքերով՝ Վահան իր ամբողջ էութեամբ կլանուած էր հայրենիքի ներքաղաքական իրադարձութիւններով եւ դաշնակցականի երդումին հաւատարիմ՝ կը գործէր իր դաւանած կուսակցութեան ի նպաստ, իր անձնական մասնագիտութենէն անջատ. սակայն շնորհիւ իր անյագ ընթերցասիրութեան՝ վերածուած էր «Շրջուն հանրագիտարանի» մը՝ նպաստելով իր քաղաքական աշխարհայեացքի ձեւաւորման: Յատկանշականն այն էր, որ Վահան օժտուած էր պայծառամտութեամբ, զոր ժառանգած էր իր հօրմէն՝ Էտիկ Յովհաննիսեանէն. երկուքն ալ՝ զոյգ բեւեռներ, որոնք զիրար կը գերակշռէին իրենց մտային բացառիկ կարողութիւններով: Նոյնիսկ հակառակորդներուն կողմէ սիրուած ու յարգուած էր Վահան, իր մտածողութեան ու առարկայապաշտ մօտեցումներուն համար:

Այս բոլորին կողքին, դասախօսը անդրադարձաւ Վահանի անմիջականութեան եւ «հիւմոր»-ին, նոյնիսկ բանտի ճաղերու տօնին իր սրամիտ արտայայտութիւններուն, իր ամբողջական ու լիարժէք մարդու յատկանիշներուն՝ ափսոսալով, որ «Աւա դ, մենք չափից դուրս շուտ կորցրինք Վահանին»:

Այս տպաւորիչ ձեռնարկին իրենց բաժինը բերին Նայիրի Փանոսեան՝ ասմունքելով Ժ. Ս. Յակոբեանի «Մենք»-ը, եւ դաշնամուրի վրայ Նանօր Տէր Պետրոսեան՝ նուագելով Պախէն հատուած մը:

Աւարտին ներկաները առիթ ունեցան օրինակներ գնելու Յովհաննիսեանի զոյգ գիրքերէն՝ «Մանտիլիոն»-էն եւ «Մայրամուտ, որը պէտք է կասեցնել»-էն:

Երէկ մեկնարկեց Քուէլթի Միջ-եկեղեցիներու Ֆութպօլի Բ. Մրցաշարքը, Ալ Սուրբա շրջանի մարզադաշտին մէջ: Քուէլթի հայ համայնքը նաեւ իր մասնակցութիւնը բերաւ այս մրցաշարին երկու խումբերով՝ աւագ ու կրտսեր:

Համայնքիս աւագ խումբը, երէկ երեկոյեան աշխուժ խաղ մը ներկայացնելով (7-0) բացառիկ արդիւնքով յաղթեց «Մարոնիթ» եկեղեցւոյ խումբին, իսկ կրտսերները տուժեցին (1-2) արդիւնքով:

Յաջողութիւն կը մտղենք մեր խումբերուն իրենց բոլոր խաղերուն:

Ստորեւ կը ներկայացնենք յառաջիկայ խաղերուն ցուցակը:

Մեր ներկայութեամբ քաջալերենք մեր տղոց:

**جدول مباريات بطولة
المخلص الثانية لكرة القدم
من 18 فبراير وحتى 17 مارس 2016**

الخميس 18 فبراير م 7:00
MFT 2 ARARAT 1

الخميس 18 فبراير م 8:00
ARARAT 2 MFT 1

السبت 20 فبراير م 7:00
GROBARI ARARAT 1

السبت 20 فبراير م 8:00
MFT 1 PHOENIX

الخميس 3 مارس م 7:00
PHOENIX ARARAT 2

الخميس 3 مارس م 8:00
MFT 2 GROBARI

السبت 5 مارس م 7:00
الأول من المجموعة أ الثاني من المجموعة ب

السبت 5 مارس م 8:00
الأول من المجموعة ب الثاني من المجموعة أ

الخميس 17 مارس م 7:00
الخاسر من المباراة الأولى الخاسر من المباراة الثانية

الخميس 17 مارس م 8:00
الفائز من المباراة الأولى الفائز من المباراة الثانية



ՔԵՐՄԷՍ 2016

Քուլթթի Ազգային Վարժարանի հոգաբարձուքիւնը մեծ ուրախութեամբ կը յայտնէ սիրելի քուլթթահայութեան, որ ամէնամեայ աւանդական քերմէսը տեղի պիտի ունենայ, Զորեքշաբթի, Հինգշաբթի եւ Ուրբաթ 24,25,26 Փետրուարին:



Ընտանեկան հաճելի մթնոլորտի մէջ տեղի ունեցող սոյն ձեռնարկին պիտի մատուցուին համադամ ճաշեր, տեղի պիտի ունենան խաղեր, եւ այլ անակնկալներ.....պիտի գործէ snack bar, փոքրիկներու համար շպարում եւ տիկնիկային թատրոն:

Ուրախութեամբ կը տեղեկացնենք նաեւ, որ Քերմէս 2016-ին իր մասնակցութիւնը պիտի բերէ Լիբանանէն յատուկ հրաւիրուած,սիրուած երգիչ **Յակոբ Մկրտիչեան**:

Միասին առաւել ուրախ դարձնենք մեր տօնը:

17 / 2 / 2016

Տնօրէնութիւն

www.armenianprelacykw.com